



8. novemberi 2016

UKA2016/68/144

Timmisartuutileqatigiiffik Air Greenland nunatta tamakkiisumik pigisariaqarneranik, imaluunniit nunatta piginneqataassutaasa, 37,5 %-iusut, naalagaaffimmut imaluunniit SAS-imut tunineqarpata, taakku arlaat nunatsinnut imminut akilersinnaanerunersoq pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Anthon Frederiksen, Partii Naleraq)

Nunatsinni pigisat nalillit aqunneqarneri, kiisalu suliffeqarfiit inuiaqatigiinnit pigineqartut aqunneqarnermini, annertunerusumik inuiaqatigiit pisariaqartitaat aallaavigalugit ingerlanneqarnissaat, nunatsinnilu amerlanerussuteqartunut aningaasarsionertigut ikorfartuinerunissaannut aqutissiuinermi iluaqutaanerunissaat anguniarlugu apeqquteqaat allaavigalugu oqallinnissamik siunnersuut.

(Inatsisartunut ilaasortaq Per Rosing-Petersen, Attaviitsoq)

Siullermik Inatsisartuni ilaasortanngorlaatut, maani inimi uanilu oqaluttarfimmi ataqqinartumi suleqataanissannut aqutissiuvisimasunut, tapersersuisunut, minnerunngitsumillu innuttaaqatinnut tamanut qamanga pisumik qujanaq, aammalu maanni inimi suleqatigilikkanut ilaanni qularnanngitsumik assoralisimaartarumaarluta aammalumi oqqumooqatigiittarumaarluta, suleqatigiilluarnissatsinnut tamassi kissaappassi.

Inatsisartunut ilaasortap Anthon Frederiksenip Partii Naleqqameersup §36 naapertorlugu oqallinnissamik siunnersuutaa.

Partii Naleqqamiit, Inatsisartunut ilaasortap Anthon Frederiksenip oqallisissiatut saqqummiussaanut qujavugut.

Ilanngullugu oqallisissiamut atatillugu, Naalakkersuisut akissutaat tusaatissatut paasivarput.

Taamaattorli angallannermi sullissilluni kiffartuussinissamik isumaqatigiissutinut tapiissutitut atorneqartartut aningaasarpasuit 150 mio koruunit missaaniittut, isumaliutigilluagaa-nerusumik atorneqarnissaat siunertaralugu misissuisoqassasoq kissaatigaarput, assersuutigalugu angallannermi sullissilluni kiffartuussiffiusuni tapiissutitalinni

suliaqarfiusuni suliaqartussamik, nunatsinnit inuttaasunillu tamakkiisumik piginneqatigiiffigineqartussamik misissuisoqannissaa uagut Partii Naleqqamiit orniginartipparput.

Inatsisartunut ilaasortap Per Rosing Petersenip attaviitsoq, § 36 naapertorlugu oqallinnissamik siunnersuutaa, tassungalu atatillugu Naalakkersuisut akissutaannut tungasoq.

Oqallisissiamut atatillugu, Naalakkersuisut akissutaat tusaatissatut paasivarput.

Partii Naleqqamiit, Inatsisartunut ilaasortap Per Rosing Petersenip oqallisissiatut saqqummiussaanut qujavugut, imatullu oqaaseqarfigissavarput.

Atorfinitsitsisarnermi piumasaqaatit sukaterneqartariaqarput soorlu makkuninnga: Kalaallisu oqalussinnaaneq allassinnaanerlu, atorfigiligassamut naleqquttuuneq ilinniarsimaneq, il.il.

Namminersorlutik Oqartussat suliffeqarfiutaat ataasiakkaat minnerpaamik affaat namminersortunngorsartariaqarput. Assersuutigalugu: Qasigiannguani Royal Greenland A/S-ip tunisassiorfiata pigineqarnermigut affaa Qasigiannguani innuttaasut; tunisassiorfimmi sulisut, aalisartut tunioraarsut, il.il. tassa namminneq kajumissutsiminnik piginneqataarusuttut piginneqataatilerlugit, aammalu piginneqatigiilersussat aqqutissiunneqartariaqarput namminneq siulersuisuuneqalerlutik, namminnerlu aaliangikkaminnik ulluinnarni aqutsisussaminnik toqqaasalerlutik, taamaalilluni suliffimmut akisussaaqataaneq piviusoq aallartinniassammat aammalu kajuminnarnerulerluni kiisalu sulisuinnaanani piginneqataalerluni. Taamaaliornikkut Kiinamiunik tikisitsiniarneq pisariaarusinnaalluni, avammullu nunarsuup sinneranut toqqaannartumik niuersinnaangorlugit, aammalu sinerissap sinnera tamaat taamatut aaqqissuussiffigalugu.

Ineqarnermut aammalu A/S INI-mut tungasut.

Ineqarnermut aaqqissuussaanerput aaqqissuuteqqittariaqarparput, tassa illut aammalu inissiat pisortat pigisaat inuit namminneq pigilersinnaasariaqarpaat, kisianni ikiortariallit puigornagit, taamaalilluni naggataagut INI A/S-tut ittut pisariaarunniassammata. Tassami nalunngilarput INI A/S-ip ingerlanneqarnera qanoq akisutigisoq, aammalu inissiat INI A/S aqqutigalugu attartortakkat qaammammut akisoqisut, ilaatigut nammineq illuutillit qaammammut akilertagaannut sanilliullugit akiliinerusarlutik naak namminneq pigilersinnaangikka-luarlugit.

Assersuut: Ukiuni 50-ini inissiaq attartortup najoreerlugu, ila 3 mio kr. missaani akilereerlugit, qaammatini marlunni kinguaattoorluni akiliinngitsoorpat taava INI A/S oqassaaq ANIGIT, aammalumi matup tigummivialuunniit pigilernikuunngikkaa.

Taakkualu oqallisissiat partii naleqqamiit taamatut oqaaseqarfigaagut.

Henrik Fleischer